



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim TAPAK 8

'Biplab Deb masü saka 'Big-Flop Deb': Abhishek Banerjee

Blinken-i China foreign minister den ajurutep



VOL. XIX NO. 24 (ADOK 24) DIMAPUR TENTONÜ (MONDAY) YIMPOKSÜI (NOVEMBER) 01, 2021 ₹ 5.00

## Kohima nung National Unity Day among

**Dimapur, October 31, 2021 (TYO):** Field Outreach Bureau Kohima-i Jawahar Navodaya Vidyalaya (JNV), Kohima den yaritepa National Unity Day (Rashtriya Ekta Diwas) mongogo. Iba sentong ya October 31, 2021 nü JNV Hall Kohima nung agi.

"National Unity Day ya küm shia October 31 Sardar Vallabhbhai Patel asoba anogo tenü nung amonger" ta Principal Incharge JNV Kohima Besü Kollo-i ashi.

Linük longjemtsü aser Patel-i India putiotsü nung shilem agiba osang metedaktsütsü atema iba benjung amonger, ta pai ashi.

"2014 küm India sorkari Rashtriya Ekta Diwas amongtsü

tenzük. Home Ministry-i iba anogo nung asen linük indang tashi aser telongjem akangshitsü ta metedakja liasü" ta shisalen sayur Arun Kumar-i ashi.

Chuba yimli 565 longjemdaktsür India linük kümtetba nung Patel-i tongti shilem agia liasü, ta paisa ashi.

"Iron Man of India Vallabhbhai Patel sor taküm küm 146 buba ajunger. India nung mezüngbuba Deputy Prime Minister, Patel bilemteta 2014 nungi National Unity Day monga arur" ta In charge, FOB Kohima P. Sophie-ia ashi.

Iba sentong nung mendenji PGT Economics Atheni liasü aser PGT English Prem Kumar-i anküp tepela o jembi.

## G20 lennirtemi global warming azüoktsü lemtet



October 30, 2021 nü Rome nung alima lennirtem aser minister tem külemi agiba noksa angur.

**Rome, October 31, 2021 (Agencies):** Deobarnü Rome nung G20 lennirtemi alima tatsük akümba 1.5 degrees Celsius tashi dang südaktsütsü tenanzüktep agiogo.

Tanü parnoki nakmati amshiba azüoktsü nangzüktep saka zero emissions alizüngbo metongtet.

Alima nung carbon emissions 80% ji G20 ajanga adokdaktsür

aser parnoki tanü 2015 Paris accords nung nangzüka aliba ama inyaktü lemtet.

1.5 degree alizüng ayuba ajanga 2030 küm tashi nung global emissions tesadang ka ajemtsü aser 2050 tashi nung "net-zero" akümtsü ta mongintemi ashir.

Tanü G20 lennirtemi telemtetba tajung balaka magit

aser iba atema climate activists mepelar.

Alima nung tsüngsang-mopung lendong ataloktsü ta Hokolbarnü UN Secretary-General Antonio Guterres-i shia liasü.

Tanü Rome nung G20 lennirtemi telemtetba kecha balaka magi ta Antonio Guterres-ia ashi.

## Aluyimertemi PM Modi"er kima Diwali amongtsü amokmerener

**New Delhi, October 31, 2021 (Agencies):** Delhi Police-i Ghazipur aser Tikri borders nung lungkak aitha tesetem nungi 'barricades' agienba sülen aluyimertemi Prime Minister Narendra Modi'er kima nung Diwali amongtsü ta metedaktsüogo.

Sorkari onok iba tesem nungi anientsü merangra onoki PM Modi'er kima Diwali amongtsü, ta SKM tanishir Gurnam Singh Chaduni-i ashi.

Brihostibar aser Hokolbar anogotem Ghazipur aser Tikri borders nung Delhi police-i barricades aser barbed wires agiena liasü.

Ita 10 tejakdang aluyimertem noktangsü atema police-i barricades aser barbed wires

enoka liasü.

Centre-i Farm law asem yangluba anema aluyimertemi lungkak aita arur. Ozüng asem meyipa magira parnoki traffic tiptema mesenzüdaktsütsü ta ashir.

Honibarnü aluyimertemi Tikri nung lenmang noktanga aliba nung two-wheelers aser ambulances senzütsü atema feet 5 lapokja liasü.

"Diwali matongdang police-i lenmang lapoktsü ta olulutem jembir. Ibaji atalokra, onoki PM Modi'er kima Diwali amongtsü. Aluyimertemi timi dang gari lenmang nung amener anungji onok jashitsüsa mapa meinyaktsüla" ta Gurnam Singh Chaduni-isa ashi.

## COVID-19 Nagaland: 11 dak putet & 1 asü

**Kohima, October 31, 2021 (TYO):** Deobarnü Nagaland nung nisung 11 dak COVID-19 aliba putet aser parnok züngsema nisung ajak agi 31,842 kümogo.

"Tanü puteteremji Kohima nung 4, Dimapur o Mokokchung nung asemsem (3) aser Tuensang nung ka lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Tesüiba ghonda 24 tsüngda COVID-19 puteta alir nisung 21 tashi taneptsü angu. Parnokji Dimapur nung 13, Tuensang

nung 6 aser Mokokchung nung 2 lir, ta paisa ashi.

Nisung 31,842 rongnungi 29,904 taneptsü nguogo aser ibaji taneptsü angur 93.91% lir, ta Dr Kikon-isa ashi.

Tang nisung 210 anepaludar saka parnok 163 dakbo shirangba yimya kecha mali, ta paisa ashi.

Deobarnü COVID-19 puteta alir ka asü aser iba nisung züngsema tasür ajak agi 685 kümogo.

"Hokolbar tashi nung nisung 710,624 nem COVID-19 vaccine indang dose 12,01,464 agütsüogo" ta State

Immunization Officer, Dr Ritu Thurr-ia ashi.

Vaccine agirtemji frontline workers 60,961, healthcare workers 15,998, arishi küm 45 ser tempur 202,292 aser arishi küm 18 nungi 44 tsüngda alir 431,373 lir, ta paisa ashi.

"Vaccine agirtem rongnungi nisung 490,840-i dose anaprong agiogo. Parnokji frontline workers 47,989, healthcare workers 13,378, arishi küm 45 ser tempur 161,172 aser arishi küm 18 nungi 44 tsüngda alir 268,307 lir" ta Dr Thurr-isa metedaktsü.

## NSUD-i Naga Patient Guest House semdang



**Dimapur, October 31, 2021 (TYO):** Naga Students' Union Dibrugarh nung Alumni züngsemtemi Naga Patient Guest House (NPH), Dibrugarh semdanga liasü.

1982 küm Dr. Ditsole Mero (1981-84) tir inyakdang alizükba Naga Patient House kanga mejungi lir aser tzüngluruwa mapang tzü agi metsüngbanger. Iba tebilemstü den ali atsünga agiba onük

Alumni züngsemtemi Nagaland sorkar dang shiogo.

Tang teyangludak Naga Patient Guest House (NPH) ya küm ka tsüngda renemtsü. Iba nung conference room (hall) lir aser facility ajak aliba takdang 30 den teimba lir.

Iba ki ajanga Naga kaketshirtem, Dibrugarh-i temang anepalutsü atema arurtem aser Naga Christian Fellowships teyari angutsü.

## Assam bye-elections: Vote enoktsür 73.77% liasü

**Guwahati, October 31, 2021 (Agencies):** Assam kübok Assembly constituency nung by-election agidang vote enoktsür 73.77% ajanga shilem agiogo, ta Election Commission of India-i metedaktsü.

Assembly constituency pungu nung tebur dang nungi tetsürtemi shilem teimba agi, ta ECI-isa ashi.

Constituency pungu nung vote enoktsür rongnung tetsürtem den tebur 10,000 tema agi teimba lir saka tetsürtemi shilem teimba agi.

Vote teimba agütsürtem rongnung mezüngbubaji Thowra constituency 77.56%, tanabuba

nung Gossaigaon 77.20% aser tasembubaji Bhabanipur 76.84% liasü.

Vote tajemba agütsübaji Tamulpur nung liasü aser iba constituency nung vote enoktsür 67.84% dang liasü. Mariani constituency nung vote enoktsür 71.70% liasü, ta ECI-i metedaktsü.

By-election agiba constituency pungu nung candidate ajak agi 31 lir. Parnokji Gossaigaon aser Bhabanipur nung tii (8), Tamulpur nung 6, Thowra nung 5 aser Mariani nung 4 lir. November 2, 2021 nü votes azüngtsü.

Gossaigaon aser Tamulpur

nung teinyakdak MLA ana asüba ajanga by-election agitsüsa aküm. Külén, Bhabanipur, Mariani, aser Thowra nungi MLA temi menden nungi anener BJP nung aden.

Meghalaya: Meghalaya nunga yashi assembly constituency asem nung by-election agia liasü.

Mawryngkneng, Mawphlang aser Rajabala constituency tem nung yashi nikongdang 5:00 ako tashi nung vote enoktsür 80.86% liasü, ta Chief Electoral Officer (CEO) Frederick Kharkongor-i ashi.

Constituency asem indang by-election nung candidate ajak agi parnok 13 lir.

## Northeast & Kashmir nung RSS telok amentetstü

**Guwahati, October 31, 2021 (Agencies):** 2025 küm tashi nung Rashtriya Swamsevak Sangh (RSS)-i Northeast state tem aser Kashmir nung telok ulushitsü sentong lir.

RSS indang national executive committee senden amendang Northeast states aser Kashmir nung RSS telok ulushitsüba tebilemba lemsatepa liasü.

Iba osang ya RSS general secretary Dattatreya Hosabale-i metedaktsü.

Northeast state tem aser Kashmir nung RSS telok balala tenteta mali. 2025 nung parnok

küm 100 ajungba mong amongtsü.

"Tang development blocks 6,483 nungi 4,683 nung onok lir saka March 2024 tashi nung onoki India kübok development blocks ajak tongnür" ta Dattatreya Hosabale-i ashi.

Mizoram, Nagaland, Kashmir aser Lakshadweep nung Sangh-i maparen meinyaker. Kashmir nung Sangh-i Shakha lapoka liasü saka Hindu nungeri toktsür aiba sülen iba mapa nung timtem ajuruogo, ta paisa ashi.

RSS regional Pracharak temi pei pei state nung mapa inyaka

aotsü atema sentong renemtsü. Anogoshia tesem 34,000 nung Shakha maparen inyakdar, ta Hosabale-isa metedaktsü.

Taküm ya India nüjiso anguba sülen platinum jubilee lir anungji Sangh-i nüjios atema rararitem bilemteta exhibitions agitsü lemtetogo, ta paisa ashi.

Deepavali nung mopung menenba nungi kümzüka ayutsü atema 'cracker ban' atema asüngdangdang "iba ama telemtetba ya benjung mapang masü saka küm tetenzüklen agiadoktsüla" ta Hosabale-i langzü.

# Naga Students' Union Dibrugarh Hon Jubilee mungogo



Sacred Heart Cathedral Compound, Dibrugarh nung October 30, 2021 nü Naga Students' Union Dibrugarh pur Hon Jubilee benjongmung amungba mapang Naga Patient House nung nungshilong ka azungba sülen tangokba noksa nung angur.

**Dimapur, Mongputeni/Oct. 31 (TYO):** Kaketshirtem lungjemtsüla, angazüktüsü aser shisaliok tajung ajangettsüla aser Nagaland-i meyipa shilangba mapang tajungtiba nung state tenzüktüsü, ta Minister, Planning & Coordination, Land Revenue and Parliamentary Affairs, Government of Nagaland, Neiba Kronu-i October 30, 2021 nü Sacred Heart Cathedral Compound, Dibrugarh nung Naga Students' Union Dibrugarh pur Hon Jubilee benjongmung nung ashi.

State nung Medical College ka nügdaker, koba tang tashi mamenokteti lir, aser iba ama reju ka amenoktsü atema nübu aser takotet nisung nügdaker, ta pai ashi.

Dibrugarh nungi Naga nung kaketshir nübu tejen kar tenüng benoka jembiba mapang, medical aser para medical tsütsü nungi football asayar takotet, T Ao, minister asür TM Lotha aser legislator Dr. Neikesalie Kire nungertem athishia jembia.

Kronu-i sentong nung adener dang ka amai bilema kati ka atema süoki ia bilemtsüba ajanga tesendaktep yangertsü aser tesunep lemsateptsü

ayongzüka liasü. Naga Students' Federation tir Kegwayhun Tep-i iba benjongmung sentong nung jembiba mapang NSUD tenzüker nem akum agütsü aser kati ka akumtsübutepa tejakleni aotsü ayongzüka liasü.

Shisaliok bushitsü aser state alema oa itemji takum nung amshitsü kanga tongtipang lir, koba ajakibo meinyakteter, ta pai ashi. Tep-i kaketshirtem dang lenir kaka akumtsü aser state tenzüktüsü ayongzüka liasü.

Nagaland Staff Selection Board (NSSB) ajanga Naga nung lanurtem tarutsü nung pei tejangraba inyaktetsü aser sorkar mapa nung nübu shimba tsütsü ochishia inyaksü, koba tekeratiba nung mapa kuma aotsü aser kasa mapang sorkar dang tekeratiba nung iba mapa bentetratetsü ajungshir, ta Tep-i ashi.

Sentong nung Kape Khalo-i tir o jembiba mapang, Dibrugarh nung azungba Naga nung kaketshir nüngdakba abensatsütsü aser Dibrugarh nung Naga nung ka kuma lungjemdaksütsü nükjidong nung Union ya 1971 küm tenzü, ta ashi.

"Iba lokti nungi tejen nisungtem aika tanübo

academic, medical, state yimten yimsüsüba aser saisapong wadang balala nung lenir lir," ta pai ashi.

Dibrugarh nung Naga nung kaketshir sadoksayima aser kumzüka alitsü atema NSUD ajanga teti shilem tajung agia arur, ta pai tenüngsang agütsü.

"Tensa majungba mapanga NSUD den Dibrugarh nung aliba Naga nung teyi-tüti nungertemi Naga nung kaketshir aser nüburtem atema lenmang balala nung yaritepa arur."

Iba sentong nung Ethungbemo Ezung Senior Alumni, Drug Inspector cum Medical Device Officer, Drug Control Administration, Department of Health and Family Welfare; Er. Talikaba Longchar, Advisor, NSUD, Senior Managar, Engineers India Limited; Savizo Kezieo, Ex- President, NSUD aser Himaloy Barik, General Secretary Dibrugarh University Post Graduate Students' Union nungertemia salem o jembia liasü.

Iba benjongmung nüngtem nung nüngshilong ka Naga Patient House nung azünga liasü aser nüngo kaket ka saya liasü.

# Chaga Gadi benjung mungogo

**Dimapur, Mongputeni/October 30 (TYO):** Chaga Gadi benjung ya Zeliang nung aser talisa Peren District, Assam aser Manipur nung aliba Liangmai nungetem indang benjung tulutiba lir. Iba benjung ya October 30 nü mungogo. Liangmai nungertemi küm shia iba benjung ya October ita tatemi 30 nü aser 31 nü amunger.

Iba benjung ya nüburtemi iba anogo tulusangi pa temaotsü agütsür aser iba ajanga alu

junga aruba den anema toktsür ta amangba dak ajemdaker amunger. Benjung amungba ajanga tsürapur aser kibong kümer aliba par jalatem aser adianutem tsüngda tesendaktep yanglushir.

Benjung amungba anogo tsürapur, adianu aser tebu tambu, tanubu nungertemi parnok jala, adianu (tetsür) tem nem chiyongtsü tajungtiba renema bener yoker, koba dang called "Chakuangpun ncham" ta ajar aser kasa

mapang nung tetsür laer kinungertemia parnok nem chiyongtsü tajungtiba, yi nung amala renemer pei tsürapur, adianu aser tebu tambu, tanubu nungertem kidangi yoker, koba dang "Tetam" ta ajar.

Putir-i, maparen ajak tembanga inyakba aser tenokdangba agütsür alibatem salatsüba sangdongba sülen tetsür tebur kecha mebendangi yimdaklirtem ajak benjung matem tashi benjungteper.



All Ward Union Mokokchung Town (AWUMT) ketdangsürtemi 30th Oct, 2021 nü Mokokchung PHED, Executive Engineer tasenba Er. Hebo Zhimomi ajurutepe pa den mensem ka amendang tangokba noksa nung angur. Iba mensem nung AWUMT ketdangsürtemi Mokokchung town nung nüburtem tzi agi anüngakongba khuret lemsatep aser E.E Hebo Zhimomi ajanga department-i akokba tashi lemangtem bushia anepalutsü asoshi shia liasü. Mokokchung, 30th October, 2021

# Governor-i Chavang Kut benjong salem lemsatep

**Dimapur, Mongputeni/Oct. 31 (TYO):** Kuki, Chin aser Mizo nung adianu aser adianutsür aser Nagaland nung Kut benjong salem lemsatep, ta Assam & Nagaland Governor, Prof Jagdish Mukhi-i sangdong ka nung ashi.

Ibai alu tsüksüng-ensünga aruba atema tepela lemsatepba benjong ka lir. Iba benjong mapang tain aser tanurtemi tsüngsangba, ken atenba aser

saisapong balala nung shilem agia asen sobaliba tajung wazüka ayur, ta pai ashi.

Tesem balala nung nüburtemi benjong amungba ajanga tali lungjemer aser telengjem agi terenlok lidaktetsür.

Iba benjongmung nung Tsüngremi nenok ajak nem anema aliba, tesunep aser yimchi-yimjung moajang, ta Governor Prof Jagdish Mukhi-isa ashi.

# 5 Ghaspani-II AC nung NDPP executive senden amen



**Dimapur, Mongputeni/Oct. 31 (TYO):** 5 Ghaspani-II Assembly Constituency nung NDPP ketdangsürtem senden ka October 29, 2021 nü MLA Zhaleo Rio, IAS(Retd.), Advisor, Sericulture, Excise & Minority Affairs, Govt. of Nagaland kidang mena liasü.

Iba senden nung party nung inyaker aser lenirtemi benokba onük balala jembia liasü aser pangzüng aika renema ayu.

MLA Zhaleo Rio-i party nung inyaker dang yimchi-yimjung, tesunep aser terenlok atema lungjemer inyaksü ajungshiba den külemi iba senden nung Charlie Sekhose, Senior Vice-President, NDPP Central; Kaka Zhimomi, Founding Member, NDPP; Miathou Krose, Core Committee züngsem; Dosau Kuotsu, tir, NDPP 5 Ghaspani-II A/C; Tokihe Zhimomi, General Secretary, NDPP Ghaspani-II A/C; Teneikolie Krose, Vice-president, NDPP 5 Ghaspani-II A/C; Zasivi Meyase, P/S to Zhaleo Rio; Megezomeü Khate, tir, NDPP Women Organization; Matthew Niphi, tir, NDPP Youth Organization aser ano regional

aser central party lenirtemia jembia liasü.

Parnoki taruba election nunga Nagaland Chief Minister Neiphiu Rio aser NDPP Nagaland tir Chingwang Konyak lenisüba kübok maneni Zhaleo Rio, IAS (Retd.) yaritsü akangshia renema liasü.

Iba senden nung party züngsem aser party nung tenüng zülüokba nung maneni temolung agütsütsü, yimdak-yimtsüng sasep nung party worker inyakyim aser parnok temaba jenjangi ajungkettsü atema amalitep alitsü aser yariteptsü indang jembia liasü.

Parnokisa tang tashinung terenlok maparen balala inyaker aliba, tang teinyakdak aser inyaksü atema proposals tem agüja aliba, Nagaland nung NDPP tarutsü nükla indang jembia liasü.

Iba senden tenzükdang COVID-19 tashidak agi party züngsem takum samar alir nem akum agüja minute ka mokrema liasü aser lokti sarasadem agia sentong tenzü.

Iba senden nung Khekiho Zhimomi, Working President, NDPP 5 Ghaspani-II A/C menden liasü.

# BJP Mkg pur tenüngsang agütsüba sentong ka agi

**Dimapur, Mongputeni/Oct. 31 (TYO):** Bhartiya Janata Party, Mokokchung district kümsük 2019-2022 pur office nung küm ana tashi inyaka aruba atema tenüngsang agütsüba sentong ka BJP office nung October 30, 2021 nü agia liasü.

Iba sentong nung BJP Mokokchung district tir, Imolemba Jamir-i 'Our journey together - Ever forward' onük nung ajemdaker jembia liasü.

Pai ashiba agi, BJP ya national party ka asünung 'high command' ajanga ashiba tematiba lir. Linük lenir, state lenir aser booth level lenir dang lir aser iba dak alaka talila mali aser tajemba mali, ta ashi.

BJP ya nübur tiyong südaktsüba party ka lir, anungji Mokokchung nung aliba karyakartas - ketdangsürtem nungi booth level lenirtem tashi - ochishia inyaksüla, kechiaser BJP nung inyakba ya lenir ka

ama alitsü tajaba ka lir, ta pai ashi.

BJP Mokokchung district tatong tir, Lanutoshi Longkumer-i iba senden nung tajungshi o jembiba mapang, nübur tenzükbba wadang nung tali lungjemshitsü ayongzüka liasü.

Party nung tajung-tamajung ajurur, saka nübur tenzütsü teti temolung nung alitsüla, ta Lanutoshi Longkumer-i ashi. Paisa BJP ketdangsür aser karyakartas dang temolung ulushitsü ayongzüka liasü.

Iba senden nung Kisan Morcha indang tongti zülur Tiarenla menden liasü. Senden nung Koridang Mandal tir Limanungsang, 27 Mokokchung Town Mandal tir Tiakumzuk aser 26 Aonglenden Mandal tir Taliwati nungeria jembia liasü.

Iba senden nung BJYM Sate Executive Member, Limameren Longkumer-ia jembia aser senden tembanga sülen chiyongba mapang liasü.

# 'Swarnim Vijay Mashaal' Aizawl tongogo



**Aizawl, October 31, 2021 (Agencies):** Honibarnü takok temaitsü 'Swarnim Vijay Mashaal' milak Mizoram yimtiba Aizawl tongogo.

'Swarnim Vijay Mashaal' ya 1971 küm rara nung India-i Pakistan madak takok anguba tamaitüsü lir.

Mizoram aser Assam arrtsü nung Swarnim Vijay Mashaal milak Vairengte jila tonga aruba mapang, Headquarters Inspector General Assam Rifles (East) kübok Headquarter 23 Sector Assam Rifles indang Aizawl Battalion nem iba takok milung (victory flame) agütsü.

Kasa anogo Vairangte nungi Assam Rifles indang contingent kati Assam Rifles ground, Aizawl tashi iba 'flame'

bener ao.

Aizawl tashi iba flame benar aruba mapang, lisopurtemi tejangraba tulu nung shilem agia liasü, kong lisopurtem den 'Bikers Club' aser tangartemi shilem agiogo.

Iba flame Aizawl tongli dang takok anguba (1971 küm tongbangrara nung India-i Pakistan madak takok anguba) benjungmung sentong tenzüik.

Aizawl kübok Assam Rifles ground nung iba sentong agiba mapang, Chief Minister Zoramthanga aser Assam Rifles DIG Brig. Digvijay Singh naprongla aruagi iba sentong moatsüogo.

Kasa sentong nung, Assam Rifles indang sepaitem, 1971 War Veterans, 457 Field Hospita l(57 Mountain

Division) nungi sepaitem, Veer Naaris aser NCC Cadets tem dena liasü.

Iba benjungmung sentong nung, Assam Rifles indang Pipe Band-i shilem agi, Local Troupe ajanga tsüingsangba sayu aser linük asoshi taküm bendanga agütsür raraba atema war veterans aser Veer Naaris nem tenütsang den souvenir agütsü.

Iba Victory flame pezü, koba New Delhi nung Ato Kilonser Narendra Modi-i tenzüksü, iba flame ya linük indang tesem pezülen (cardinal directions) yoka liasü.

Eastern India atema iba victory flame ya Silchar nungi Aizawl tonga aru aser November 04, 2021 nü iba flame Agartala atongtsü.

# Mary Kom kinungboi Assembly election nung tokteptsü

**Imphal, October 31, 2021 (Agencies):** MC Mary Kom kinungbo K Onkholer-i taruba Manipur Assembly elections nung tokteptsü.

Honibarnü Onkholer-i lokti sentong ka nung iba osang metetdaksü.

Churachandpur district kübok Saikot constituency nungi pai tokteptsü.

"Iba constituency nung teinyaksü aika lir" ta Onkholer-i ashi.

Taruba Assembly elections nung tokteptsü ta osang sangoktsü nunga Onkholer-i pa koba party nungi tokteptsü'ar osang memetdaksü.

Onkholer-i independent



candidate ka ama tokteptsü akok ta osang ka ajanga ashi. Ano, tanga osang ka ajanga pai BJP ticket imlar.

Manipur kübok Saikot constituency nungi tang Congress lennir aser MLA TN Haokip lir.

# Assam police-i apuba Mizoram police constable chiokogo

**Aizawl, October 31, 2021 (Agencies):** Hokolbarnü Assam Police-i apuba Mizoram police ka bail nung chiokogo aser pa yashi Mizoram tongogo.

Assam police-i India Reserve Police indang 1st Battalion nung constable Laldintluanga Ralte apu.

Hokolbarnep 1:30 ako meta Kolasib district kübok Bairabi jila nung bomb ka apokba dak sendakba nung pa dak tai tonglokja apu.

"Bomb ji Mizoram police duty post nungi metre 100 shi pilar apok aser ibaji repranga jangjatsü atema Ralte yok" ta Bairabi Police station officer-in-charge, Lalrinhlua-i ashi.

Ralte iba tesem tonga aodang Assam police idakji liasü aser parnoki pa apu aser tapoktsütem bena lir ta ta tai tongloktsü, ta paisa ashi.

Iba sülen pa Assam kübok Ramnathpur police station-i anir

ao, ta Lalrinhlua-isa shisem.

Ralte ket nung tapoktsü kecha maliasü mesüra bomb apokba nung pa shilem mali. Pai bomb apokba tesem reprangi aodang police sübotsü agia liasü aser prangpong maben, ta paisa metetdaksü.

Assam police-i onok dang Ralte apuba indang osang mashi. Onok tsüngda asüngdangtepdang ang pa pur aoba osang metet, ta Lalrinhlua-isa ashi.

Ralte apuba osang angashiba sülen Mizoram police telok ka Ramnathpur police station-i ao saka pa Hailakandi-i anir orr liasü.

Honibar nikingdang Ralte bail nung chiok aser yasüngsa pa Bairabi-i anir aruogo.

Ralte chiokba sülen ang Mizo Zirlai Pawl (MZP)-i Bairabi jila aser Hailakandi district sendaktepba lenmang mokdangba lapoktsüogo.

# 'Biplab Deb masü saka 'Big-Flop Deb': Abhishek Banerjee

**Agartala, October 31, 2021 (Agencies):** Deobarnü Agartala kübok rally tuluka nung Trinamool Congress (TMC) general secretary Abhishek Banerjee-i jembidang Biplab Deb aitsü.

Iba rally nung jembiba mapang Abhishek Banerjee-i tashi amer tim mesüi yimsü asür ta temolung meleme bilemba atema Tripura nung Biplab Deb-i aniba BJP sorkar aitsü.

"BJP indang tashiyim aser tim mesüi yimsü asüba anema raratsü aser iba telok madak

takok angutsü" ta Abhishek-i ashi.

Tang Tripura nung yimsü süa aliba sorkar (BJP) aitsüba den bendenloksema Abhishek-isa State CM aitsüogo aser TMC lenniri Tripura chief minister Biplab Deb ya "Big-Flop Deb" ta tenüng agüja luja jembitsü.

"Tripura chief minister ya Biplab Deb masü, saka Big-Flop Deb," ta TMC general secretary Abhishek Banerjee-i ashi.

Abhishek-isa, tenüng jatetsüba atema ni anema ken o benokang ta CM Biplab

ayongzüik.

Tripura nung mosque amakba dak sendakba nung telangzüba agüja Puja benjongmung mapang Bangladesh nung lendong atalokba khukhua aitsür, ta Abhishek-isa metetdaksü.

"Parnoki inyakba mang ayangtsü asoshi asenokia kasa telangzüba agütsüra Bangladesh, Pakistan aser asenok (Indians) tsüngda kechi balaka tebandang ali," ta TMC general secretary Abhishek Banerjee-isa ashi.

# Tripura police-i Bangladeshi nunger 10 apu



Tripura police-i Bangladeshi nunger apur rongnung kar noksa nung angur

**Agartala, October 31, 2021 (Agencies):** Tripura police-i Bangladeshi nunger 10 tashi apu. Parnok ya ozüing alema India-i aruba atema apu. Bangladeshi nunger pezü

Churaibari check post nung apu. Parnok ya Assam nungi bus gari ka nung Agartala-i arudang apu. Par pezüprong ya Bangladesh kübok Rajshahi nungi lir.

Ano, Hokolbarnep Tripura police-isa Assam den arrtsü anasa Bangladeshi nunger 6 apu. Parnok rongnung tetsür pezü dena lir aser policei bushisingdang ka tenzüikogo.

Form No. 3

[See Regulation-15 (1)(a)] / 16(3)

**DEBTS RECOVERY TRIBUNAL GUWAHATI**  
Suwarna Bhawan, House No. 12, New Town Path,  
Near Hanuman Mandir, G.S. Road, Ulubari, Guwahati- 781007 (Assam)

Case No.: OA / 117 / 2021

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No. 1349

**BANK OF BARODA - VS - M/S. NEW ZOOM COLOUR LAB**

To,  
(1) M/S. NEW ZOOM COLOUR LAB  
Prop. Mr. Subasish Das, Shop D-2, Basement Floor, T S Arcade, N L Road, Dimapur, NAGALAND- 797112.  
(2) MRS. SARBANI DAS  
W/o Mr. Subasish Das, House No. 11, Sematilla Colony, Dimapur, NAGALAND- 797112.  
(3) MR. SUSANTA DAS  
S/o Sri Himangshu Ranjan Das, House No. 11, Sematilla Colony, Dimapur, NAGALAND- 797112.

**SUMMONS**

WHEREAS, OA/117/2021 was listed before Hon'ble Presiding Officer / Registrar on 27.10.2021.

WHEREAS this Hon'ble Tribunal is pleased to issue summons/notice on the said Application under section 19(4) of the Act, (OA) filed against you for recovery of debts of Rs. 33,10,469.99/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under :-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 13.12.2021 at 10:30 A.M. failing which the application shall be heard and decided in your absence.

**Given under my hand and the seal of this Tribunal on this date: 28.10.2021.**

Signature of the Officer Authorised to issue summons.



## TIR YIMYIM YIMOBILEM (EDITORIAL)

DIMAPUR TENTONÜ, YIMPOKSÜI (NOVEMBER) 01, 2021

### Tarezmük ya kobateka aser kopiga ?

**1** 929 kum January ita nungi tenzüka British India government den Naga yimten temeten aser taginüba indang jembia arur, joko, taküm agi kum 92 buba alimai meteta, India den Naga nungner nem yimten nüchiso angutsüba temeten indang ken o lemtepa arur. Aji oda, taoba kum 92 tsungdaji, Naga nungner linük tenzükertem dang masü saka yimtaklir, kenyongi tai maket, tongmelang takümtem aika India sepai ket nung maksü, reshikangshi aser tasüba dena ajuruogo. Iba amaji, Naga nungner yimten nüchiso bushir ket nung India sepaitema lendong timtem aser tasüba aika ajuruogo. Ajisüaka, kati ka den talangka aremzüktepa arur külen, tang yimjung nung, India den Naga yimten nüchiso bushir teloktem Naga yimten tebilemstü onük benoka jembidagi. Naga nungner asoshi tia majung, Naga yimten nüchiso bushiba lenmang nung jajadang tatongtsü ka matong ser, len tom nung Naga nungertem rongnung temulung melemtep aiben adoka telok ka agi ana aser ana agi pezü ta telemsa adoka aruba, tangbo, joko, telok pezü agi telok tenet ti ka kuma lemsar India government den onükbo kasa Naga yimten onük, saka tebilemba aser taginüba balala kümer, kümsa kum ajurutepa jembia, telemtepa kati marutet timtemba angur. Kin ka yimten nüchiso atema kum noklang junga rarabaji mapang talangka, anungji teinyaker kabo kanga meranga aser kanga aremzüktepa yimten nung shilem agia arudagi ta bilemdi. Joko, kum noklang junga raraa arur asünungji, Naga yimten nüchiso jembir tenzükertem ajak alima nungi pilaogo aser parnok chir aser semchirsemnurtemang tanü Naga yimten tongpang nung nokdaka lir. Aji oda, Naga yimten nüchiso jenjang balaka malangtettetaka, tang tashi Naga yimten temeten onük mesamadaksüi India den jembia arutetba kisungjia tanü Naga nungner lanurtem asoshibo takok tuluka asütsü. Iba tangatetba nung Naga yimten ken o ya memenui taruba ita ishika tsungda nung telemtepa kati marutet, anosa jembia aonungbo, ashiko, ano tang alir Naga yimten lenirtem aikati pei arishi agi matatetsüa akok. Aji oda, Naga yimten ken o kum noklang junga metembangtet amshia arudang, Naga nungner lenir ka süli, telokang talila ka rakzüka oa kümlü ta asüba tensa tia asenoki aiben ajangashiogo. Iba amaji, ano tanga Naga nungner yimten ken o jembirtem rongnung tongtibang lenir ka ana süadokra, metsütsüi ano telok tasenang ka ana talila kumadoksüa akok. Iba ama tebilemstü aser timtem ya madokli ka adokra, koda asütsü ta shisabolua bilema, tanü Naga yimten nüchiso telok balala nung lenirtemi iba ama mapang tamajungji majurutsüa paidoksü tim. Tanü Naga yimten ken o jembirtemi metettsüba kaji, tanü Naga nungner lanurtem rongnung Naga yimten nüchiso indang süoki ia bilemer aser jembir kanga ajema kumogo. Ibaji Naga lima aser Naga yimten memeimba agi masü saka tanü putu tensa agi alima rangben ya pei lima aser pei yimtsung amai kumadokba agi, tanü putu lanurtem asoshibo " na koyimer ? koba kin ? kechi kidong ? koba tzükong ? ta asüba tasungdangba aser telangzubatam ya kangabo menügdaki kumogo. Aji oda, yimten temeten asoshi raraba yimya yaa tanü putu den apet merarara, terarar mali pasasa samadoksü. Atangji, Naga yimten nüchiso atema kum noklang junga raraa arutetba tashi ya tarezmük ajanga lir. Naga nungertem rongnung kanga shisamaka, azütokshia kanga raraogo. Ajisüaka, kati dak den aremzüktepa ajanga Naga nungner ajakbo mesamai karbo anünga alir. Aji oda, Naga yimten nüchiso tongpang nung ya India-ia aser Naga nungertemia kanga aremzükgogo. Tanga Naga yimten nüchiso bushiba tenung nung, linük tenzükertem dang masü saka nübortema sarusachi agi anogo shia timtem aser takoksa ajurudagi. Iba jagi, kobateka aser kopiga aremzüksü ta asüba shisaboluba shisatsü ka nübortem mulungjangi iadokogo. Aji oda, tarezmük ya teka agi amshitetba aser tenük agi anguba oset ka asünunga, tarezmük ya kobateka aser kobapiga süla ? Kopiga India yimtenia Naga nungner alena yutettsü ? Kopiga Naga nungertemia India den raratettsü ? Kopiga Naga nungertemia linük tenzükertem dang aremzüktettsü ? Aser Naga yimten nüchiso asoshi timtem aser takoksa arema nokdakertemia, kobapiga tongpang nung nokdaktettsü ? Item ajakji bilemdanga alima putu tensa den apet aser asen tashi yari, yakta Naga yimten jenjang ka latettsü asoshi, ashiko, tanüa Tsüngremibo Naga nungner asoshi mapang tajung ka bentsür arutsü südi ta bilemer.

## OLEMSABANG

### OCHI NUNG NOKTAKBA LENIR

Baptist Pastor Martin Luther King Jr taküm nungi tangazüksü

~ Sashikümla Longkumer

(Yashi adok nungi...)

Kiyong balala nung, lenmang balala, tzübo, hotel, dokan balala liasü. Tanak pur nem yimden yimsüsüba menden magütsü. Sentep ki balala liasü. Temesung puri Kibuba Benjong tanak pur nem magütsü. Yimden maparen nunga second class citizen dangi tamajungba jenjang nung yutsü. Putu aika dang meyongnem agütsütsü memela. Item tashiyim anema MLK-i anir August 28, 1963 Washington DC-i nisung 2,50,000 atenshia alidang pai "I have a dream" ta asüba ya jembiba lir. Pai tasü itta "I have a dream that my four little children will one day live in a nation where they will not be judged by the color of their skin, but by the content of their character." Ochi mapa nung telemsa mali anungji, Tsüngrem tsungdang tanak, temesung, tetsür tebur, alar nüchi ta telemsa mali. Tanak ochi temeten mangu tashi noktaksü ta pai "No, no, we are not satisfied, and we will not be satisfied until justice rolls down like waters and righteousness like a mighty stream...." Yamaji American lima künübo ochi agi koktetsü ta ayimoktsü. Ochi agi azükba marem temesung nungner shilu phukümertemi (white racist) April 4, 1968, MLK Memphis, Tennessee nung tepset. Saka pai tasü itta noktakba ajanga US nung tanak shilu jenjang tajungba ngutet. Tanüa pa mapa aser shisatsü tarok ajanga ochi nung tasü itta noktaksü ajongmesor aser tasü tait tanela agütsür. Ochi nokdangtsü makok. Ochii teti takok angur ta MLK takümi kuli asür.

**MLK amai Arogo nung tenzüker kwikati ochi nung noktaktettsü?**

Asen lima nung arogo tenzükeri ochi nung tasü itta menoktaketba ajanga teraksa aser ochimashi jendi adoker. Tanir lira nüburtemi anitaksü, saka arogo nung tenzüker aika "Arung Yanglushidi" ta ochi nung noktaker mali. Ni iba ochi ya jembia, ochi mapa inyaka ochimashi anema noktak nung nüburtemi kü dak mesaklokra, ni sempara, sodi agüjadokra ta asüba tasü mait tebilembatem nem aika kokdaksür mesüra ochimashi agi kokroka nendaksür ola madoki anak aowi temloka lir. Saka MLK sen meimba, popularity bushiba, kecha meinyak lokti nung lenir ta khonang asoshi masü, saka nübur asoshi bendanga agütsütetba tasü tait lenir ka liasü. MLK-i shinga metsübu, Tsüngrem dang tsübu. Lokti nung temelenshiji azü tokshia raraba ajanga masü, saka temeim agi, azü metokshii tai temenen tuteta ashiba ajanga dang temelenshi bener arutsütsü ta metet. Yisu Khrista tesayubaji tashiyim agi azü tokshia nok-nü agi masü, saka temeim aser ochi ajanga ta angatet. Anungji MLK-i non-violence ajanga dang temelenshi bener mapadong ajak inyakj. Naga lima nung temelenshi bener marutetba kuli kaji asenoki azü tokshia raraba ajanga nüchiso bushir. Naga yimden latet nung MLK ama non-violence leader nungdak aser aji arogo tenzüker nungi adoktsüla aser anitsüla. Nübur ajonga non-violence ajanga temelenshi ta arakzüksü movement kata arogoi tanü tashi Naga lima inyaka mali. Ya arogo tashi mait ka ta metetdi.

Kodang ochi nung noktakba ajanga ochimashi lenir akoksatsüsa kümdir, parnoki sen, tashiyim amshia ochiji anemtsütsü merangtsü. MLK-i aniba non-violence movement tashi meit-i kümdaktsütsü asoshi sen aser tashiyim amshi, saka lenir-i ochi nung ammet nung mekottet. Temesung shilu atema tanak nisung nüchi kumra shibai alar mapa inyaksütsü, shibai alu mapa, shibai ki mapa inyaksütsü ta asüba khuret tulu liasü. Pastor kati yimjung atema inyaksütsü, koda sür yamai nübur rongnung makmakshimak adokdaksü ta tasü mait indang jembia aser aitsü. Pastor ka teinyaktsüji tanela anir aruba mapa tongtibangba masü no ta jembia. Saka MLK-i ochi atema tasütsü metsübur ta noktak. Tanak nisung nüchi mangu tashi longkak aitsü ta noktak. Tanak nisung iba lima nüchi mungutetra kotak yimli koda sür ajangzüktettsü ta sayu. Ochi nung tasü itta noktak nung MLK taküm alidang 25 tashi jail nung pok, 4 ben züka merenshi. Tatensa iba nisung ya tepseta meindok nungbo menokdangtettsü ta bilemer white racist-i MLK tepset. Kasaji Mahatma Gandhi India ya secular state ka asütsü nungdak ta noktak nung Hindu fundamentalist-i kaset, Nelson Mandela, Aung San Suu Kyi, a.a. nüburtemi mulungba yimden asoshi noktakba ajanga tashiyim yimsüsüri jail nung kum aika pokba ayuba nguogo. Asen kumtetdakba Yisu Khrista ochimashi yimden yimsüsür dang nenok sensaker ashioksürtem, aser tamang yimsü lenir dang nenok tiyazü tesayur ta aitsüba ajanga pa kangki nung meta. White racist-i shi temang tepseta entok, saka MLK-i ochi nung noktakba metepsetet. MLK-i taküm tenla ajanga tanak nisung alar jenjang nungi nüchiso angu. MLK ama arogo nung toklang tenzükertemi ochi nung pei taküm kwikati tenlatsü mulungtettsü? Asen lima temelenshi aginera MLK ama lenir aika nungdak.

MLK amai Clean election atema ni ochi nung noktaksü. Tasütsü metsübur ta toklang tenzüker aser jatetba purtem kwikati shitettsü? Asen tenük agi ngua ochimashi jendi inyakba angur. Mapabo meinyak, saka senbo agizüka agiadok ta asüba osang aika azünger. India nung lokti terenlok nung tamajungtiba state ta jungkai adokogo. Item ochi mashi lenir tanaben asenoki shimtsü na? Ochi aser nübur memeimer lenir nungdak mali. Yimtaklir tantsür-tambur aser sensaker atema aruba sen tulur aser tetsungda nung awazürtemi aouya agiadoker, nüburtem aika sensak tia nung yuja lir. Backdoor appointment aser süpokrem agi asen lima süngogo. Election ta süra azüdokshi, temesepba, chidiyungdi aser yim o yim na tsükchitep, yimer o yimer na tsükchitep agi süngogo. Ochi nung shibai noktaksü! Arogoi ochi nung menoktakra shibai yimden yimli nung ochi indang jembitsü. Asen tenüki ngua Election mopungsem kanga sashia ondaki, ochi mashi aser auyaba sen agi nisung tenük, temulungjang, shisatsü pokdaksüba mapang arur. Arung! Tsüngremi ochi mesotsü nungloktsüba tashi nung Khrista ayak jangjadakja Clean Election nung tasü itta ochi ola adoka, ochi mapa inyaka, tasü tait mera agiba ajanga ochi jungkai adokdaksüdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir**

## Chin State nung sepaitemi rocket agi Tenla ki ana poksatsü



October 29, 2021 nü Myanmar nung Chin state kübok Thantlang jila nung sepaitemi ki aika rongdoktsüba mapang tangokba noksa nung angur. Iba noksa ya Chin Human Rights Organization-i saya.

**Mongputeni/October 31, 2021:** Myanmar linük nung Khristan nütsüng timba aliba Chin State kübok Thantlang jila nung Burmese Army (Tatmadaw)-i rocket amshia Tenla ki ana aser Baptist Arogo office ka densema poksatsü aser 160 shi rongdoktsüogo, ta International Christian Concern (ICC)-i metetdaksü.

October 29, 2021 nü anüngdang 11:00 ako nungi tenzüka Tatmadaw sepaitemi parnok camp nungi rocket aser injang sashia khaloktsü.

Chinland Defense Force (CDF)-i ashiba agi, parnoki sepai ka khasetba sülen ibaji mangyanga sepaitemi injang aika khaloktsü aser ki aika rongdoktsü.

Osangbener den jembidang CDF züngsem kati, "Miji koma ser tenzükar onoki mejangja, saka sepaitemi asa-a mi senoktsü südi ta onoki bilemer," ta metetdaksü.

Nisung 10,000 shi aliba jila Thantlang nung tangbo nisung ishika dang anünga lir, kechiyong nütsüng timbaka jenshiogo.

Chin Human Rights Organization (CHRO)-i sangdong ka ajanga, Church on the Rock aser Presbyterian Church Tenla ki na densema Thantlang Baptist Arogo indang office-a poksatsüogo. Sepaitemi mezüngbuba khadokba rocket jagi Thantlang Baptist Arogo indang kikümbang nung kongshia liasü.

October 30, 2021 nü CHRO-i nenshia U.N. Security Council dang Chin State tensa atema rongdak senden ka ayongzüka mendaktsüner, ta mepishigo.

CHRO nungi Salai Za Uk Ling-i, "Sepaitemi nüburtem meyong kiojen jenti raksatsüba jagi 'war crimes' kübok ozünga alema lir," ta metetdaksü.

Taküm May ita nungi tenzüka Myanmar anüdoklen aliba Kayah state nunga sepaitemi bomb agi Tenla ki aika

raksatsüogo.

Taküm February 1 nungi tenzüka tang tashi nung sepaitemi nisung 1,200 dak tema tepsetogo aser parnok rongnung nisung 130 shibo kanga reshikangshiba sülen ang tepset. Iba dak alia tang tashi nung sepaitemi nisung 9,000 dak tema puogo.

October 29, 2021 nü U.S. State Department-i Myanmar nung sepaitemi pua alirtem kanga reshikangshiba tatalokbatemji jungjunga bushisüngdangtsüla, ta takhangba agütsü.

United Nations nung meimchir temeden atema linüktemi Myanmar rongshitsüla, ta shiogo. Tetsür aser tanurtem densema nisung 28 interview agiba ajanga sepaitemi tepuokdak alirtem kanga reshikangshiba osang ya jungkai adoka liasü.

U.S State Department-i, "Burma nung nisungtem kanga reshikangshiba agi bushisüngdangtsüla aser aibelenertem nem temerenshi agütsütsüla," ta metetdaksü.

Taküm May-June kija nunga anüdoklen Myanmar nung sepaitemi Tenla ki ti raksatsüogo aser Khristan pongu tepseta liasü.

Buddhist yimsü amanger nütsüng timba aliba linük nung February 1, 2021 nungi sepaitemi linük yimsüsüba tenzüka sülen sepaitem aser sepai yimsüsüba anema nokdaker telok balala tsüngda raraan arudar, aser ibaji ajanga nüburtem kanga timtemer.

May 20, 2021 nungi tenzüka June ita tashi nung Myanmar kübok Kayah aser Shan state na nunga Tenla ki ti raksatsü aser Tenla kidang jenoka alir pongu tepset.

Myanmar nung Khristantem densema minority lisopurtem aika rara aliba tesemtem nung alir, talisa Thailand, China aser India den arrtsülen Khristan nütsüng aika lir.

Item tesem nung telungpur

telok balalai sepai yimsüsüba anema longkak aitertem pusemer. Raraba tesemtem nung nisung meyrjang aika Tenla kitem nung jenoka lir.

Myanmar sepaitemi raksatsüba Tenla kitem rongnung Golden Temple of Jesus, Jeroblo Marian Shrine, Our Lady of Lourdes Cave, Mother Mary Church, St. Joseph's Church, Catholic Church (Daw Ngan Khar) aser St. Peter's Church densema lir.

May 20 nungi tenzüka Kayah state nung nisung 100,000 dak tema jenshi aser iba nungjagi nisung 40,000 shibo Arogo 23 Tenla kidang jenoka lir.

National Unity Government nung human rights minister, Aung Myo Min-i, linük nung tamangba yimsü dak sendakba kiojentem raksatsüba ya rara mapang international ozüngtem alema inyakba mapa lir, ta aitsüogo.

"Tenla kidang nisungtem jenoka lia amakbajisa tamajungtiba. Onoki item tatalokba aitsür aser item tatalokba nokdangtsü atema alima linüktem dang mepishir. Onoki item tatalokba osangtem bendena atatsü aser tarutsü nung aibelenertem nem temerenshi agütsütsü," ta pai metetdaksüogo.

Taküm February 1 nü sepaitemi democracy lenir Aung San Suu Kyi densema lenirtem aika apuba sülen sepaitemi emergency sangdonga yimsü südar. Iba mapang nungjagi tenzüka democracy pusemertem sepaitemi yimsüsüba anema longkak aita manener.

Buddhist nütsüng timba aliba linük nung Khristan nütsüngbo shilem 7 dang lir. Tamalen Burma ta ajaba linük nung 1948 küm civil war tenzüka liasü.

Alima nung Khristantem reshikangshiba linük tamajungtiba 50 rongnung Myanmar ya jenjang 18buba nung lir (Open Doors USA's 2021 World Watch List).

## ANOGO ABEN TSÜNGREM DEN

## Ni Aiatai

Idangji ni ashi, Ni aiatai! Kechiyong ni makaka; kechiaser ni temeli memerükba nisung aser ni temeli memerükba pur rongnung alir; kechiyong kü tenük agi chuba temeranger telok Kibuba nguogo. Isaia 6:5.

Tamaren Tsüngrem anguba agi temenen tali jangjaa angatetdaksür aser shidakba peiji angur. Tsüngrem nema anguba agi temenen süoki ia mebilemer aser pei shidakbaji mejangjadaktsür. Isaiai tebang agi meshitetba Tsüngrem sentsüwangshi mangu tashi pei sasa temeshi ta bilemba nung temulung süa liasü südi. Isaiai Tsüngrem tsüktepba agi idangyongjisa pa koda temenen aser pa meketa aliba pur koda memerük aji angu. Tsüngrem külemtsü aser memelenshir dang alitsüba jagi tamakoktsü. Asenoki shidakba Tsüngrem külemer ta sayutsüba jagi temulungjang melenshibaji lir.

Asenoki temenen alima den asenok sasa hai aura akar aser temenen taküm alir asü? Kar Tsüngremi aginüba taküm alidang asenok Tsüngremi jenjang nungi ajemzüka lua alir aser tajung junga aliba nisungji temeshi ta aseni repranger asü? Asenoki asen meketa alirtem den dang asenok temeshibaji medemdangra, asenok bendanga meshitetba aliba taküm ka lir ta amangdakja asenok ashioktsütsü akok. Aji saka kodang asenoki Tsüngrem ajurudir, asenok telangzüba jagi "Ni aitali!" ta alitsü.

Nai meketa aliri na aser alimaji balala ta majitetdaksü tashi na meketa aliri Yisu Khrista dak amangbaji nai mangutsü. Tsüngremi Pa temeshi aliba ama na meshitetdaksüner. Kodang Tsüngremi ne dak mapa inyakdir, idakji temerüktetba ne taküm nung alitsü ibaji alimai agütsüba dang nungi balaka asütsü. Alima, na meketa alirtem dena, ne temeshiba taküm jagi temeshi Tsüngrem tenzüksü pua arutsü.

## India nung ministry mapa inyaktsü atema ICC-i cycle lema agütsü

**October 31, 2021:** India Pastor Nayak-i melamela linük nung yimtsüngtem nung senzüsemponga osangtajung Khrista osangtajung proktsü proktsü.

asemission mapa inyaktsü atema International Christian Concern (ICC)-i pastor tem aser sayutsüngirtem nem Laishiba aser bycycles lema agütsüogo.

ICC den jembidang 'Bibles & Bikes for India Initiative' ajanga tajangzüik angur pastor Naresh Nayak-i, "ICC nungi bicycle ka aser Laishiba aika anguba atema ni kanga pelar. Bicycle aser Laishibatam mangu asübo ni tang item mapa ya meinyaktetla. Item teyari anguba atema ni ICC dang kanga pelar," ta metetdaksü.

Pastor Nayak-i Odisha state nung Kandhamal District kübok aliba yimtsüngtem nung sayutsüngia senzür. India tesem aika nung ICC-Kandhamal District nung i yimtsüngtem nung pastor yimtsüng aika lir aser iba Nayak ama sayutsüngir 1,000 district ya tenem lima dak tema yaria arudar, aser asübayong lenmang ishika dang lir. Bicycle aser Laishiba aika anguba ajanga tangbo

"Tangbo ni kanga tezülen aliba yimtsüngtemi oteter, ibayongji kü ministry mapa kanga junga kümogo. Tamalenbo ni item yimtsüngi mouteti liasü. Nisungtemi Laishiba pelashishia agizüker," ta pastor-i metetdaksü.

"Bicycle ya emergency medical service ka mesük. Yimdak kar danga shiranga lira ni melamela mozü bener otsür. Kü ministry mapa nung bicycle ya tongtibang hadir ka ama lir," ta pai ashi.

"Kü nem iba sempet agütsüba atema pelar, kechiyong iba bicycle amshia ni nisung aika den Yisu Khrista indang lemsatepteter," ta pai ashi.

**OLONG PAITEP # 5983**

1		2		3		4	5			
				6						7
		8								
9				10		11				
			12						13	
						14				
16						17				

<b>TIPILEN</b>		<b>LANGTSÜNGLEN</b>	
1. Nisung jenti	- (5)	1. Tenük telong	- (9)
4. Tsük rudenba	- (5)	2. Committee dang ajar	- (5)
6. Temzüng tesashi	- (5)	3. Yagi ki okdoker	- (7)
8. S _ _ _ i	- (3)	5. Yim lenmang	- (5)
9. Nisung telemsa	- (3)	7. Temoatsü keter meyipa aruba	- (9)
10. Anogoshi	- (4)	11. Kanga junga menemba	- (7)
12. Ajanga aor	- (4)	12. Majinü	- (5)
13. Tsük rizüngdak	- (3)	13. Tzuma nung senzuba	- (5)
14. Tebang nungi adokba	- (3)		
16. Süngdong tatembangtiba	- (5)		
17. Meputep	- (5)		

**OLONG PAITEP # 5982 TELANGZÜBA**

<b>TIPILEN :</b>		<b>LANGTSÜNGLEN :</b>	
2. Bangsemo, 6. Tiptem, 8. Jen,		1. Yipten, 3. Nüja, 4. Sangro, 5. Milen,	
9. Tallia, 11. Aren, 12. Tzübo, 14. Alia,		7. Tulu, 10. Laza, 11. Aben, 12. Tiyong,	
16. Angati, 17. Odi, 18. Azü,		13. Ajizük, 14. Aitsü, 15. Tasa, 16. Aina.	
19. Sünglang.			



**2021 OCTOBER ITA LILI RESULT !**

October ita nung Lili tajungtiba (First) shimteta tanü yangi lephsia agütsür. Lili zülür-i November 10, 2021 tashi nung Tir Yimyim Office nungi senpet agizüksü mepishia metetdaksür.

**TAKÜM SARU NUNG LEMTETBA UNGER ALOKBAI YIMYIM AYIMOKTSÜR:**

- Warakla** : Taküma saru nung kechisa lemtetar jee ayimdar angang.  
**Alokba** : Hooi yimer ajak merungrongi anga liang ni, taküm saru nung lemtetba ayimoktsür.
1. Tetsür shinga tepi tazüng tashi tola kisüng semer azü ajunger menaktepa yimdong nung mejajatsü .
  2. Asangur shinga tejemi ngua longpant sepzüka lua semer mesenzütsü .
  3. Chidentsür shinga shishilemba dang tsümar nem temang nung memeimshidaksütsü.
  4. Covid 19 atemer tepang nempanger kinüngtsü kinüngbu yutsür tangar den apangteper mejajatsü .
  5. Kinüngtsü Kinüngbui memeteti INTEREST nung Sen apur kimong lumong meyokshitsü.
  6. Taküm piokji tenlaki dang asütsü ajaki angazükang amshiang ni...
- Temetetsü** : Arogo mungdang mongji aser sayutsüngi aodang tedong techi masü Tsüngrem tanela aser shisa tajung akar arogo ajanzüksüla nisung anir jajatsü. Shiri aibelendir Tsüngrem tsüngdang pei sa nokdaksü ajaki angazükang oji.

Lilir - SMS

**TANÜBO NAI LANGZÜANG**

Q. Linük kobai Syracuse 4A khaketa yok?  
 A.Spain      B.Germany      C.France      D.Italy  
 \_\_\_\_\_ (Taruba adok nung onoki langzüksü)  
**YASHI ADOK TELANGZÜBA: Yuvaraj Singh**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Lendang**  
 (n) Lenmang tom nung (on the way)  
 \* Lenchii aoertemi aenertem **lendang** ajuru.

**Lendong**  
 (n) tetsübuttsü timtem (danger)  
 \*Alima nung **lendong** kanga ataloker.



**NAI-A YA METETTER MA**

**NOVEMBER 2021 NUNG TONGTIBANG ANOGOTEM:**

- 1 November : - World Vegan Day -All Saints' Day  
 - Rajyotsava Day (Karnataka Formation Day)
- 2 November : - All Souls' Day - Melbourne Cup Day
- 4 November : - Diwali
- 5 November : - World Tsunami Awareness Day
- 6 November : - International Day for Preventing the Exploitation of the Environment in War and Armed Conflict
- 7 November : - Infant Protection Day - National Cancer Awareness Day
- 9 November : - Iqbal Day - Legal Services Day
- 10 November : - World Science Day
- 11 November : - Armistice Day (Remembrance Day) - National Education Day  
 - World Usability Day (Second Thursday in November)
- 12 November : - World Pneumonia Day - Guru Nanak Dev's Birth Anniversary
- 13 November : - World Kindness Day
- 14 November : - World Diabetes Day - Children's Day
- 16 November : - International Day for Tolerance
- 17 November : - National Epilepsy Day
- 19 November : - International Men's Day - World Toilet Day
- 20 November : - Universal Children's Day - Africa Industrialisation Day
- 21 November : - World Television Day - World Day of Remembrance for Road Traffic Victims
- 25 November : - International Day for the Elimination of Violence against Women
- 26 November : - Constitution Day of India
- 29 November : - International Day of Solidarity with Palestinian People
- 30 November : - Saint Andrew's Day

**SUDOKU # 6024      TELANGZÜBA # 6023**

4	5		7	1		3			4	9	7	6	3	2	1	8	5	
2	1	7		8	3	9		4	6	1	8	5	7	9	2	3	4	
6	3			4	5			2	5	3	2	8	4	1	7	9	6	
5		4	1	3	7			6	2	5	9	3	8	6	4	1	7	
		2	1	4		9			7	6	1	9	2	4	8	5	3	
				5				3	8	4	3	1	5	7	6	2	9	
		7	3	2			8	4	9	3	2	6	7	1	5	9	4	8
		6	5				1		9	8	4	2	6	3	5	7	1	
						3		6	1	7	5	4	9	8	3	6	2	

**OJANG LUTEP # 5570**

- ILETEBMBA :
- JAAK :
- GMAPUNNG :
- DANMANGG :
- AAM :
- ÜMKER :
- MBIJERA :
- AJIBI :
- SÜTESÜDMETAKT :
- NGLU :

**OJANG LUTEP TELANGZÜBA # 5569**

**AMBANGYIMA BENDENBA RONGSENJI KODANGA  
 JANGRATEMA MAGITSÜ IBAJI RÜRLUNG DEN SAKU**

**TAN HOPTA ATEMA - KOMA SÜLA ?**

Q. Tazünger maliba aser tazüngertem aliyonga tazüngertem dang nungi tesayurtemang teimba aliba government school-tembo ajak shibang nunga koma süla ?



Mumbai, October 31, 2021: India nung petrol aser diesel totzù jenjang maneni atuba anema Amongnü Mumbai nung Shiv Sena Party züngsemtemi Versova nungi Oshiwara tashi rally agia longkak aitba noksa nung angur.

### Vaccine ajema agütsüba District 40DMsden PM-i senden amentsü

**New Delhi, October 31 (Agencies):** Tawa India nung coronavirus vaccine crore 100 agütsüba alizüing atongba sülen Ato kilonser, Narendra Modi-i linük nung coronavirus vaccine kanga ajema agütsüba district 40 dak tema district magistrates den November 3 nü senden amentsü, ta Amongnü ketdangsertemi metetdaksü.

Vaccine mezüingbuba dose shilem 50 den tajemba agütsüba aser tanabuba dose-a kanga ajema agütsüba district tem nungi District Magistrate tem iba senden nunggi adentsü.

District 40 ji Jharkhand,

Manipur, Nagaland, Arunachal Pradesh, Maharashtra aser Meghalaya state tem nung lir; kasa senden nung item states nungi chief minister tema adentsü.

Ato kilonser G20 aser COP26 senden nung denner linüki meyipa aruba sülen tekaraba nung district ketdangsertem den senden amentsü, ta PMO sangdong ka ajanga metetdaksü.

Amongnü sorkari, tang tashi nung states aser Union Territories nem vaccine dose crore 112 dak tema agütsüogo, ta metetdaksü.

Union Health Ministry-i,

states aser UTs ket nung tang vaccine dose crore 13 dak tema anünga lir, ta metetdaksü.

Centre sorkari linük tesem ajungalen tekaraba nung vaccine agütsüdaktsüner, ta Health ministry-i metetdaksü.

Taküm January ita nungi tenzüka linük nung vaccine agütsüba sülen sorkari states aser UTs yaria coronavirus vaccine angati agüja arudar.

Covid vaccination inyakyim tasenba kübok Centre sorkari linük nung vaccine yanglurtem dang nungi vaccine shilem 75 alizüka states aser UTs nem angati agütsür.

### Ladakh nung rarar ITBP sepai 260 nem Special Operation Medal agütsü

**New Delhi, October 31 (Agencies):** Anüdoklen Ladakh nung China nunger PLA sepaitem den tasü itta rarar Indo-Tibetan Border Police (ITBP) sepai 260 nem Amongnü Union Home Minister's Special Operation Medal agütsüogo.

Amongnü Union home ministry-i sangdong ka ajanga iba award angutsüpur sepai aser state police tenüing 397 metetdaksü.

ITBP otongdar kati, yaküm May ita nungi taküm February ita tsüingda anüdoklen Ladakh nung ITBP sepaitemi tasü itta raraba aser pei mapa nendaka inyakba atema parnok nem iba award agütsür, ta metetdaksü.

Khenyongi sepai timtiba nem iba sempet agütsübaji ibai lir.

ITBP otongdari, "ITBP sepaitemi kanga temekong tekong nung 'snow leopard' operation kübok Ladakh arrtsülen anüker. Sepaitemi asalentong yanglua inyaker aser sendaktepa aliba organizations den amalitepa inyaker," ta metetdaksü.

Award angurtem rongnung taoba mapang Leh nung aliba ITBP north-west frontier nung Commander, Inspector General (IG) Deepam Seth-a densema lir.

Deepam Seth ya tangbo ITBP headquarters nung inyaker aser China nunger commander tem den senden 10

ben amenba India sepai ketdangsertem rongnung pa-a densema lir.

China nunger PLA sepaitem den tasü itta raraba atema yaküm-a ITBP sepai 20 nem police medal for gallantry (PMG) award agüja liasü.

China nungeri ambangyima inyakba sülen 1962 küm mezüing ITBP sepai 90,000 shi tenteta liasü aser parnok nem India-China Line of Actual Control (LAC) kilometer 3,488 anüksü mapa lezmükja liasü. LAC nung sepai post karbo süklep 18,800 tema nung lir.

Union Home Minister's Special Operation Medal ya 2018 küm nungi tenzüka küm shia agütsür.



Lucknow, October 31, 2021: Sardar Vallabhbhai Patel asoba anogomong aser National Unity Day anogomong nung Lucknow nung school balala nungi kaketshirtemi parade nung shilem agiba noksa nung angur.

### Yaküm India nung anogo shia tanur 31 shi soseta asü

**New Delhi, Mongputeni/October 31 (Agencies):** 2020 küm India nung anogo shia tanur (arrshi küm 18 ser tekübokpurtem) 31 shi soseta süogo, ta National Crime Records Bureau (NCRB)-i metetdaksü.

Mongintemi ashiba agi, India nung anogo shia tanur aika soseta asübaji coronavirus wara tenzüka, iba sülen school shibangba aser lockdown ajanga asütsüa akok, ta metetdaksü.

National Crime Records Bureau-i, 2020 küm linük nung tanur 11,396 soseta asü; 2019 küm nungbo tanur 9,613 dang soseta asü, anunggi yaküm tanur soseta asübaji 2019 küm den medemdangra shilem 18 agi timba soseta asüba lir, ta metetdaksü.

NCRB-i, tanur 4,006 bo kibong dak sendakba timtem balala ajanga soseta asü, tanur 1,337 nüknüraba dak sendakba kuli ajanga asü aser tanur 1,327 shirangba agi soseta asü, ta metetdaksü.

Tanurtem soseta asüba tongti kulitem rongnung- peii sabuba nisungtem, mapa manguba, senotsü timtem, tanur masoba

asertemesepba mozü achiba kulitem densema liasü.

Child Protection, Save the Children Deputy Director, Prabhat Kumar-i, Covid-19 tenzüka, iba sülen school tem shibangba aser loktliba nungi pilaa aliba ajanga tanurtem mental health tamajungba aküm, ta metetdaksü.

Kumar-isa, "Tanurtem timba-timba soseta asüba ya ajanga inyakyim tamakok anguba kuli sayur. Tanurtem nem maongka agütsüsü, parnok dak aliba sempet jangjatsü aser tarutsü nung parnok nükjidong ataloktsüsü atema inyaksüji tsüraburtem, kiyongertem aser sorkar teinyaksü mapa lir," ta metetdaksü.

Coronavirus wara tenzüka mapang nungi iba ya ajanga tanurtem mental health kongshitsü ta tebilemstü kaa liasü, ta lai ashi.

"NCRB data nung shia aliba agi, 2020 küm tanur 11,396 (tebur 5,392 aser tetsür 6,004) soseta süogo. Iba tetezü linük nung anogo shia tanur 31 shi soseta asü mesüra ghonda shia tanur kabosa soseta asü," ta lai ashi.



Srinagar, October 31, 2021: Taoba mapang Ato kilonser, Indira Gandhi aser Sardar Vallabhai Patel na asoba anogomong nung Srinagar nung Jammu & Kashmir Congress Tir, G A Mir aser lenirtemi asür ana nem akhüm agütsüba noksa nung angur.

### Küm 70 tsüingda Congress-i yangluba ajak BJP-i ayoker: Priyanka

**New Delhi, October 31 (Agencies):** Amongnü Congress lenir, Priyanka Gandhi Vadra-i, Congress-i küm 70 tsüingda yangluba kiojen ajak BJP-i yokadoker, ta aitsü.

Priyanka-i, linük nung Congress-i railways, airports aser gari lenmangtem yanglu, aser tang BJP-i item ajakji yokadoker, ta aitsü.

Uttar Pradesh kübok Gorakhpur nung election rally ka nung jembidang lai, "Congress-i Railways, airports aser lenmangtem yanglu. Parnoki (BJP) ajakji ayoker. Nenoki küm 70 nung kechisa inyaker, ta parnoki onok dang asüingdang. Küm 70 tsüingda inyakba ajak parnoki küm 7 nung amajok kümdaktsüogo," ta metetdaksü.

Uttar Pradesh nung mapa manguba tebilemstü ya kanga tongtibang onük ka lir, ta shia lai, "Tang Uttar Pradesh nung mapa mengui alir lanur crore 5 lir. Mapa manguba tebilemstü ajanga (UP nung) anogo shia lanur asem soseta asür," ta metetdaksü.

Chief Minister, Yogi Adityanath yimsüsüba kübok kin aser nübur telemsa ajak anema inyaker, ta shia lai, "Sorkari Dalit nunger, südakertem, Backward classes, sensakertem, minority tem aser Brahmin nunger ajak anema inyaker. Yogi Adityanath-i Guru Gorakhnath tesayubatem anema inyaker. Iba sorkari anogo shia nüburtem anema inyaker," ta ashi.

Uttar Pradesh Assembly election atema Congress-i BJP den inyaker, ta party kari jembiba dak sendakba nung Priyanka-i, "Congress-i BJP den külemi inyaker, ta parnoki (SP aser BSP) jembir. Ni ya asüingdangner- nenok timtemba mapang kechiba parnoki nenok meyarir. Congress-i dang nüburtem tenüing nung rarar. BJP den tesendaktep ayutsü agibo ni tasü ang asütsü," ta ashi.

Sangküm küm tetenzüklen Uttar Pradesh nung Assembly election agitsü lia party aikati election atema nüboyim tenzüko.



Rome nung G20 summit alidang G20 lenirtem Trevi Fountain jakdang nokdaka aliba noksa nung angur. Ananü amenba Group of 20 senden Deobarnü tembangogo, aser COVID-19 tashidak wara tenzükba sülen alima nung economy tulutiba linüktem nungi lenirtem adenshia senden amenba ibai mezüngbuba alitsü.

## Blinken-i China foreign minister den ajurutep

**Washinton, Mongputeni/October 31 (Agencies):** US Secretary of State Antony Blinken-i Deobarnü Rome nung Chinese Foreign Minister Wang Yi den ajurutepa human rights dak sendakba nung tebilemsü alibatem lemsatepogo.

Blinken-i, Xinjiang, Tibet, Hong Kong, East aser South China Seas, aser Taiwan nung China nung inyakym anemba metetdaksüogo, ta state department otongdar Ned Price-i ashi.

Blinken-isa, DPRK, Burma, Iran, Afghanistan aser tzümopung dak sendakba nung linük ana tejangraba kasa aliba aser külemi longjemer

inyaktetsüba indang lemsatepogo, ta Ned-isa ashi. Lenir anaprongla G20 summit nung shilem agiba mapang Rome nung ajurutepogo. March ita Alaska nung ajurutepba sülen lenir ana tang mezüngbuba ajurutepogo. Iba senden nung China nung lenirtemi US dang mepelaba lemsatepa liasü.

Alima nung takartiba linük ana tsüingda tang shishilemba, human rights, Taiwan aser Covid-19 ken o dak sendakba nung mangatettep adoker lir.

Iba hopta Washington-i China Telecom Americas dang parnok mapa anogo 60 tsüingda nung shibangtsü tetuyuba agütsü aser

iba ajanga tesendaktep nung ano tetsükdaksü adokogo.

US tir Joe Biden-i, taoba tir Donald Trump-i benoker aliba ama Beijing anema trade policy tesashi benokogo.

Kasa mapang nung ita tsüingda Taiwan dak sendakba nunga linük ana tsüingda mangatettep adoker lir.

China-i US tembar Taiwan ya parnok meyong ta ashir aser nüngdak dang süra tashiyim agi atsüingtsü ta shia arudar.

Mongolbarnü Blinken-i, UN agency tem nung Taiwan nem shilem tuluba agidaksütsü ayongzükogo ajisüaka Beijing-i parnok alima diplomatic sabang nung kecha jenjang mali ta ashir.

## Covid-19:Sri Lanka nung tenokdangba agitsü

**Colombo, Mongputeni/October 31 (Agencies):** Sri Lanka nung Covid-19 wave tasembuba poktetba ajanga May ita province tsüingda senzisenpongtsü tenokdangba agütsü aliba Deobarnü agitsüogo. Medical professional temi iba jenjang magitsü asoshi tekümdangtsü metetdaksüa iba jenjang ya agiogo.

October 1 nü sorkari quarantine curfew aginjaka senzisenpong nung tenokdangba agütsü aliba maneni benoker liasü.

Public transport minister Dilum Amunugama-i, transport service tem Hombarnü nungi inyakshangshi tenzüksü, ta sangdongogo.

Sri Lanka Medical Association (SLMA)-i, tenokdangba agütsü aliba salatsüra wara poktetshitsü akok ta tekümdangtsü metetdaksü aliba mapang ka nung tang iba jenjang agiogo.

Tir Gotabaya Rajapaksa dangi shiti ka nung SLMA-i, taoba mapang dang nungi tang jenjang agibatema ya tongtibangba asütsü, ta shiogo. Parnokisa, health dak

sendakba nung tetuyuba balala agütsü aliba kanga junga asadangtsü shiogo, kechiyong nüburtemi item tetuyubatem sülen tashi angaa manidaker.

Maneni parnoki yakbang nung inyakertem aser tantsür tamburtem nem Pfizer vaccine booster mesera dose tasembuba agütsü benokdangogo.

SLMA-i tawa bushitsüingda ajanga, China indang Sinopharm vaccine agütsüba tantsür tamburtem shilem tenet dakbo tashidak anema immunity junga renloka mailba ngutetba metetdaksüogo.

Senzisenpong nung tenokdangba agütsü aliba agitsüba sülen tantsür tamburtem dak tashidak atemtsü anan nung lir, kechiyong iba tashidak agi parnok dak tali kongshir, ta SLMA-i ashi.

Health ministry indang epidemiology unit-i Honibarnü linük nung nüstünyongsük million 21 nungi million 15.4 nembo vaccine dose kabo agitsüogo aser million 13.4 nem dose anaprongla agitsüogo, ta metetdaksü.



New York yimti nung mapa inyaker ajunga COVID-19 mozü agitsü ozüing agütsüba anema New York City municipal nung inyakertem Gracie Mansion Conservancy kima longkak aitba noksa nung angur.

## Sudan mitkar anema longkak aitdang nisung asem khaset

**Khartoum, Mongputeni/Oct. 31 (Agencies):** Sudan nung mitkartemi tashiyim amshia sorkar atsüingdokba sülen civilian-i aniba sorkar tanaben amenokang ta takhangba agüja linük tesem ajungalen nisung meyririjang aikati Honibarnü longkak aitba mapang mitkartemi nisung asem khaset, ta doctor temi ashi.

Sudan indang Central Doctors Committee ajanga ashiba agi longkak aiter nisung asem ya sepaitemi linük yimtiba, Khartoum indang twin city, Omdurman nung longkak aitba mapang tepset.

Saka Sudan police temi longkak aiter dak injang agi makha ta ashir aser police ang ka injang agi yiru, ta state TV nung ashi.

Nüburtemi linük yimtiba nung tesem ajunga sema Sudan indang nisan amer jajaba mapang "Mitkari yimsü asüba magizüker" aser "Iba linük ya asenok indang, aser asen sorkar ya civilian lir," ta ayimtena liasü.

Longkak aitertemi

democracy dangi meyiptsü akhanger, mitkartemi mera balala agiba aitsür aser pua alirtem chioktsü akhang.

Sudan TV ajanga ashiba agi, Sudan security forces temi Khartoum nung lenmang tongtipang aser apu tem shibang, saka Halfaya aser Soba apu lapoka liasü.

Nüburtemi central Sudan, eastern, northern aser western len aliba yimitem nunga longkak aita liasü. Khartoum nung nisung meyririjang aika adenshi, ta tenük kuli alirtemi ashi.

"Nüburtemi parnok meyipa aotsü tamakoktsü aser sorkar tashi nübur meyong, ta osang sangoktsüogo," ta longkak aiter Haitham Mohamed-i ashi.

Honibarnü central Khartoum nung sepaitem aika yoksema liasü, aser item rongnung army aser paramilitary Rapid Support Forces dena liasü.

Hombarnü General Abdel Fattah al-Burhan-i Ato Kilonser Abdalla Hamdok'er cabinet agienba atema hopta tepiyong Sudan nung

meyririjang aikati longkak aita aru, aser mitkartemi yimden tashi rakzüker longkak aiter dak tashiyim amshiba ajanga anüolen linüktemi sen dollar million aika jenjang teyari soita liasü.

Tang tashinung security forces temi nisung 13 tepsetogo aser democracy busemer aika pua lir, aser ano mitkar indang sorkari parnok anemer pua merenshia azüdokshi tali ajurutsü akok, ta ashir.

Ajisüaka longkak aiter temolung meranga lir, aser ano mitkar anema nisung million aikati longkak aitsü teimla lir.

Ketdangsurtemi internet aser phone line nung tenokdangba agütsüba ajanga longkak aitertemi leaflets, text messages, graffiti amshir aser tesem balala nung rally ayongzüker.

"Mitkari onok yimsü masütsü. Iba osangji onoki sangoktsütsü. Mitkartem teka nung azü lir aser yimti-yimtung nung kasaji ajurutsü, saka onoki metsübur," ta nübur temeden asoshi nokdaker Tahani Abbas-i longkak aitdak ashi.

United States-i mitkar inyakym aija aser civilian-i aniba sorkar tanaben amenoktsü ajungshia arur, aser mitkartemi Honibarnü kechi inyaker yangji parnok tebilemba metettsü, ta ashi.

Sudan indang security forces temi meimchir temeden akumtsübuttsüla aser yimjung nung longkak aiter anema azüdokshiba magizüksü, ta US Secretary of State Antony Blinken-i ashi.

Sudan nüburtemi azüdokshi melie democracy atema nokdakba nung US maneni adentsü, ta pai Twitter post ka nung ashi.

2018 küm December ita nungi tenzüka tang tir menden nungi atsüingdoker alisang Omar al-Bashir anema nokdakba mapang yakyaka aliba tesem balala nung resistance committee temi animesor longkak aiter, kechiaser tongtipang yimten yimsürtem mitkartemi puogo.

Al-Bashir, shibai Sudan nung küm 30 jungnüa yimsü asü, pa yimsüsüba anema ita

aika longkak aita aruba sülen mitkartemi 2019 küm April ita tir menden nungi atsüingdoka liasü.

Mitkartemi sorkar tashi agiba ya mitkartemi tashiyim amshia yimten yimsüsür atsüingdokba masü, saka Sudan yimtenren temelenshi jangjashitsü atema inyakba dang lir aser 2023 küm July ita election agitsü, ta al-Burhan-i ashi.

Hombarnü sepaitemi sorkar ketdangsurtem apuba mapang Hamdok ya al-Burhan'er kidang pua ayu aser Mongulbarnü tanükba dener kidangi meyipa yoka liasü.

Ajisüaka Hamdok ya tang tashi 'house arrest' nung lir aser pa mapa meinyakteter, ta US State Department ketdangsurtemi ashir.

Mitkartemi Sudan nung yimsü asütsü merang tashi sentsüh menoktsü sen dollar billion aika pari meshiba magütsütsü, ta US ketdangsurtemi ashi.

US aser World Bank ajanga Sudan nung teyari agütsütsü aliba ajunga soita lir.

# VEI-i Mr. Mokokchung ayongzüksü

**Mokokchung, Mongputeni/ October 31, 2021 (TYO):**

Vertex Entertainment Inc. (VEI) ajanga November 20, 2021 nü Town Hall, Mokokchung nung Mr. Mokokchung sentong ayongzüksü terenemba lir. Mokokchung nung, VEI-iba ama show ya mezüing ayongzük asütsü, ta sangdong ka ajanga Vertex Entertainment Inc., president Adang Jamir-i metetdaksü.

Alima melenshia aoba den jangyumedema, Vertex Entertainment Inc, kong wadang balala nungi lanurtem dena lir, iba tentet ajanga Mokokchung nung alir lanurtem nem pei dak aketba sempet alima dang sayudaksütsü atema sabang ka agütsütsü nüngdaker ta asadanteta iba sentong ayongzüksü lemet.

Nisung taküm nung fashion ya nüngdakba shilem ka ta VEI-i angatetter. Ajasünung, Mr. Mokokchung ama sabang ajanga lanurtem (tebur) pei dak aketba sempet sayutsü aser parnok mangdang atalokdaksütsü asoshi maongka agütsütsü.

Anungji, VEI-i mezüingbuba Mr. Mokokchung ayongzüksü asalentong yangludat, koba taküm küm nungi tenzüka küm shia iba sentong ayonga agitsü aser taküm iba sentong ya 'Scintillating' omen nung ajemdaker agitsü.

Iba tetoktepba sentong nung, Mokokchung District nung alir kin aser tamangba yimsü balala nungi tebur (male citizen) ajaki shilem agitsü asoshi lapoktsür. Mr. Mokokchung nung shilem agitsü asoshi contestant temji arishi küm 18 nungi 29 tsüingda tain aser tar süklep 5.6 shi asütsüla.

Maneni, iba tetoktepba sentong nung takok angurtem atema VEI-i senpet lakh 2 den sponsor balala nungi gift hamper tajung agütsütsü renema lir. Iba den külemi fashion industry sabang nung ajemoka inyaksü sabang agütsütsü asoshi, VEI den sendaktepa aliba fashion aser entertainment house balala longjemer takok angurtem aser shilem agirtem nungitta yaritsü.

Aruya aliba Mr. Mokokchung dak sendakba nung osang tejangja agitsü atema, VEI-i Mr. Mokokchung nung shilem agitsü jangra alirtem dang ph no. 7085421004/8413884583 nung Show Manager Ms. Arenla Pongen den tongteprateptsü asoshi mepishir, ta kasa sangdong ajanga metetdaksü.

**DIMAPUR LONGJANG SENSO TELONGJEM**  
*Kim Tenem Bajangmung*  
 Anogo : 4<sup>th</sup> November 2021  
 Mapang : 10:00 AM  
 Tesentepdak :  
 Dimapur Government College Auditorium

Omen: *Loraro*



Onük Jombir :  
 Dr. Anungla Aier  
 (Rtd. Director, Higher Education)

Sentang Lentr :  
 Kr. Imsurenla Imchen  
 Sp. Imtionen Longkumer

Sentang Lapoktsü :  
 Longjang Kaketshir Telongjem Dimapur

*Sentang*

1. Telok Ken : Temoatsü Tzünglu Yoktsü
2. Temoatsü meshia : Wb. Imtatsung Imchen, Sarasademtsü Assoc. Pastor, DABA
3. Tarur Pela Agizükba: Wb. Y Among Jamir, Tir, DLST
4. Asür Bilemtetba : Wb. Imkum Imsong, Home Evengelist
5. Tayongzükba O : Chairman, Medemchanger Putu Menden Longjang
6. Jubilee Ken : Medemchanger Chutener I/C Imsongti Imsong & Nungshiwabang Longchar
7. Tepela O : a) Tir, Ao Senso Telongjem Dimapur  
 b) Tir, Dimapur Asetkong Telongjem  
 c) Tir, Mokokchung Longjang Senso Telongjem  
 d) Tir, Kohima Longjang Senso Telongjem  
 e) Tir, Chumukedima Longjang Senso Telongjem  
 f) Tir, Dimapur Longjanglar Telongjem
8. Sobaliba Ken : Lanu Tata Zunga Dimapur
9. Tajungshi O : Prof. L. Tongpang Longkumer, SASRD, Nagaland University
10. Onük : Loraro
11. Melepzüng O : Chairman, DLST Golden Jubilee Planning cum Fund Raise Committee
12. Tatem Sarasadem: Wb. C. Tinu Pongen

**Iba sentong nung Longjangsor aser anük-apang ajak medema adentsü ayongzük.**

**Sür Küm 10 Ajungba Bilemteter  
01-10-2021**



**K. TEMSURENLA**

Yashi ang kotaker talidaki nai onok toktsür ao ama bilemer. Nai inyakba mapa tajungtem aser asenok pelatepa kazüba mapangtem mebilemtetti anogo ka danga süitema maerer.  
 Nü temeim aser jakla tajungtem, onoki kangasa menungrar.

**Temeim Kinungbo aser Kinungertem.**

**Happy 96th Birthday**



**"Kupu apuba kolakji sentsüwangshi korang; Aji temeshiba taküm ajanga ajangzük" - A.shin 16:31**

Tsüingrem tauchi agi **Ojala Markangla** (Asangma), wife of Late Imkongakum küm 96 arishi moatsüba tepela lemsateper.

**Loving Children, Grandchildren & Great Grandchildren, In-laws.**

## 'Miss Mokokchung 2021' Nov 6 nung shimtsü



Miss Mokokchung 2021 senpet atema tetokteper kongrular parnok 11 noksa yangi angür.

**M o k o k c h u n g ,** teloki taküm agi kümnabuba nung tepor tajung kongrular 11 agi shilem agitsü.

**Mongputeni/October 31, 2021 (TYO):** Mokokchung "Nurture. Equip. Empower" omen dak rangloker ayongzük. Taküm 'Miss Forerunners Mokokchung' Mokokchung 2021' tetoktepba

Iba aonung Alobo Naga, The Elemen, Wapang Longkumer (Naga Orpheus) aser ano tangartemi kentenmenü balala ajanga shilem agitsü ta osang ajanga angazük.

## Sangküm January 9 nung Golden Globe Awards sentong agitsü

**Mongputeni/October 31, 2021 (Agencies):** Hollywood Foreign Press Association (HFPA) ajanga parnok website nung agüja aliba ama, telecast partner ka mali nunga, 79buba Golden Globe Awards sentong ya sangküm January 09, 2022 nü agitsü.

Movie aser TV entry form tem November 15, 2021 anogo tashi agizüksü aser nomination tem December 13, 2021 nü sangdongtsü. HFPA indang website nung, 79buba Golden

Globes sentong ya sangküm January 9, 2021 nü agitsü, ta metetdaksü.

Taküm küm tetenzüklen, Los Angeles Times sangdong ka ajanga, iba tentet nung züingsem 87 rongnung Africa kin journalist ka danga mezüingokba maparen tamai adokdaksüba sülen, aikati HFPA aija liasü.

Iba osang angashiba sülen, Golden Globe Awards sentong den küm aika inyaka aruba telecast partner - NBC-i parnok

sabang nung 2022 Golden Globes mesayutsü ta sangdongogo.

Iba maparen dak sendakba nung, Hollywood star Tom Cruise-ia Golden Globes award asem tashi meyiptsü. Iba sentong nung Tom Cruise-i 'Born on the Fourth of July', 'Jerry Maguire' aser 'Magnolia' atema award agizüka liasü.

Taküm indang Golden Globes sentong agiba mapang, HFPA indang lennir asem - Helen Hoehne, vice president; Meher Tatna, board chair aser

taoba president; aser Ali Sar, president nungeri sabang nung mangatetep adokba indang telok dang metetdaksü. Züingsem asempronglai, tebandang kecha mekai iba sentong nung ajak (Africa kin d e n s e m a / [ B l a c k representation]) nem shilem lemezüksütsüla aser aji kanga tongtibang; iba den külemi 'temzüng' ka ama züingsem ajak meyoktepa shilem lemezüksütsü asoshi onoki inyakdar, ta ashi.

## Pacifists FC-i Open FUTSAL Tournament kokogo



**Dimapur, Mongputeni/October 31 (TYO):** Dimapur Changki Students Union-i ayongzükba Open FUTSAL Tournament yashi Backyard Futsal Ground, Nuton Bosti nung tembangogo.

Asayamung final asaya Pacifists FC aser Tribals FC na asaya aser Pacifists FC-i goal ka agi iba asaya koka liasü. Asaya nung goal ka ya Moti-i idakja liasü.

Mezüngbuba semi nung Tribals FC-i goal 5-0 agi Hurricane FC madak takok ngua liasü. Tribals FC atema Apu-i goal pezü idaktsü aser

goal ka ya Eiben-i idakja liasü.

Tanabuba semifinal asaya nung Pacifists FC-i Iron Ground FC tie-breaker nung goal 2-1 agi akok. Atakzuka aliba mapang tembangba tashi nung telok anapronglai goal kaka dang agütsür tembangba sülen tie-breaker asayaa liasü.

Asayamung shibang sentong nung o jembiba mapang Dental Touch, proprietor Dr. Temjen Longchari-i, asayartemi küm ana asem tsüngda nung parnok koba jenjang tonger alitsü, iba indang nükjidong tejangja ayutsüla, ta ashi. Asayartemi tarutsü nung national aser

international jenjang nung asayatsü atema meranga inyaktsü ayongzük. Paisa, asayamung kanga takok ngua ayongzuka asayaba atema Dimapur Changki Students Union nem tenüngsang agüja liasü.

Asayamung akokba team Pacifists FC nem senpet sen 30,000 aser Runner up Tribals FC nem senpet sen 15,000 agüja liasü. Kasa mapang nung Tribals FC asayar Apu nem Golden Boot naroküm aser Tribals nungisa Eshong nem Best Goalkeeper naroküm agüja liasü.

## Chennai Super Kings-i Neeraj Chopra nem sen crore 1 agütsü

**Mongputeni/October 31, 2021 (TYO):** Indian Premier League asemben tashi koker aliba Chennai Super Kings team-i Deobarnü Olympic gold medallist Neeraj Chopra nem Tokyo Games nung pai takok tajung anguba atema sen crore 1 agütsüogo.

Sen crore 1 indang cheque ya Chennai Super Kings Cricket Limited tenüng nung Olympic champion javelin thrower nem agüja liasü. CSK-isa, number 8758 (pai gold medal angutsü atema nület meter 87.58 atsüba) ajenoker jersey ka pa nem agüja liasü. India nung rongnungi Abhinav Bindra sülen Chopra-i dang Olympics nung gold

medal nguteta lir.

Neeraj-i takok tajung anguba atema linük ajunga kanga nema adanger. Pa ya India nung rongnungi track aser field mezüngbuba medal (gold) anguba asayar lir, ta CSK CEO K S Viswanathan-i ashi.

"Pa ya taruba putu atema nükrangtong lir. Number 87.58 ya India nung saisapong puti otsü nung teti tetshitsü aser Neeraj nem iba jersey agütsüba ya tetushi ulura. Pai linük nem ano naroküm aika bener arutsütsü imlar," ta paisa ashi.

Tetushi aser jersey agizükba sülen, arishi küm 23 tain Chopra-i, taoba ita ana ya pa asoshi tajangshiba tasen

ajangshia aotsü atema maangka kanga tajung liasü ta ashiba den pa nongita yariba atema CSK management dang kanga pelaba lemsatepa liasü.

"Nenoki ni nongita yariba aser iba senpet atema kanga pelar. Gold medal anguba ajanga iba amai temeim agizüktsü ta imlaa maliasü. Ni iba ya imlaa maliasü aser ni kanga pelar. Ni maneni meranga inyaker takok tajung angutsü imlaa atar," ta pai ashi.

August 7 nü Tokyo nung nület meter 87.58 atsüba sülen Chopra ya India nung rongnungi Olympic games nung athletics nung gold medal anguba mezüngbuba asayar aküm.

## Australian Open 2022: Vaccine magirtem visa mangutsü akok

**New Delhi, Mongputeni/October 31, 2021 (Agencies):** Australia sorkar ketdangsür kati ashiba agi, Covid-19 vaccine magii alir tennis asayartem aser tanga athlete tem Australia arutsü asoshi visa magütsütsü akok.

Vaccine agitsü temzüng ya mapa kümra, Novak Djokovic-i Australia Open title tanaben atonga takok angutsü aser pa indang Grand Slam record yanglutsü asoshi tebilemstü adoker.

Novak Djokovic, shiba Roger Federer aser Rafa Nadal naprongla den Grand Slam title record (20) kasa lir, pa ano vaccine magi lir ta tan hopta metetdaksü. Iba asayamung atema tekolakpurtemi Covid-19 temzüng yanglur asünung Australian Open title atema tokteptsü osang tejangja ka

magütsütsü, ta pai ashi.

"Vaccine magi alir tennis asayartem Australia arutsü asoshi visa magütsütsü ama ni bilemer aser parnok nem visa agütsü nunga hopta ana tashi quarantine asütsüsa akümsü," ta osangbener den jembiba mapang Victoria state Premier, Daniel Andrews-i ashi.

"Nenoki tenüng teta ashiba nübu (Djokovic) mesüra tanga tennis asayar, golf asayar mesüra Formula One driver temi vaccine magira Australia arutsü asoshi visa magütsütsü. Ni ashiba tai süra federal sorkari metetdaksütsü," ta pai ashi.

"Iba virus (Covid-19) yagi asayar indang tennis ranking mesüra asayar kati Grand Slam timba koka aliba mebendanger. Iba ya khenyongi balaka aser ajaki angatetsü nüngdaker. Na

aser nü den külemi alirtem kümzuka ayutsü asoshi vaccine agitsü nüngdaker," ta Daniel-i ashi.

Tennis Australia, koba ajanga Australian Open ayongzük, iba dak sendakba nung tentet ajanga telanzüba magütsü.

Tawa, athlete mongintem atema Victoria-i vaccine agitsü temzüng ka renem, saka iba inyakyim dak sendakba nung bendanglen nungi arur athlete tem mesüra Australian state nung athlete temi iba tetuyuba nung anidaktsü asoshi oaang tejangja ka magütsü.

Daniel Andrews-i, iba temzüng ya bendanglen nungi arur athlete tem atema lir aser tongtibang asayamung nung shilem agir athlete tem atema tanga asayar dang nungi balaka anenzükdak (accomodation) anepalu masütsüla, ta ashi.

## Akash Kumar World Boxing Championships quarters-i iogo

**Belgrade, Mongputeni/October 31 (Agencies):** Deobarnü AIBA Men's World Championships nung India nung boxer Akash Kumar (54kg)-i Puerto Rico nung asayar Caleb Tirado koka quarterfinals-i iogo.

Akash, shibai taoba round-bo walkover ajanga asaya koka liasü, pai Deobarnü asaya 5-0 agi koka quarter tongogo. Pa taküm mezüngbuba iba asayamung nung shilem agidar.

Tirado-i mezüngbuba round nungbo Akash indang temang nung kanga junga tsüngshia asaya ajisüaka Akash-i pa dak tajungba tsüngshia asaya aser tetendangertemi pa pusema liasü.

Puerto Rico nung asayar-i tanabuba round nung pa tekolak ajungketer asayatsü

tekümdangtsü metetdaksüba sülen manidakba atema point ka ajemja liasü.

Iba asayamung nung India nung asayartem ajak senteper parnok 10 pre-quarters-i iogo, ajisüaka Govind Sahani (48kg) Honibarnü tsükogo.

Iba asayamung nung gold medal angur nem senpet USD 100,000 agütsütsü lateta lir.

Maneni silver medal angurtem nem senpet USD 50,000 aser bronze-medallists anaprongla nem senpet USD 25,000 agütsütsü. Taküm iba asayamung nung senpet ajak senteper USD million 2.6 agütsütsü.

Iba asayamung nung India nung asayartem ajak ya national champions nung pei category nung takok angurtem lir.

## Alan Davidson alima nungi pilaogo



**Mongputeni/October 30, 2021 (Agencies):** Australia nung cricket asayar mongin aser all rounder, Alan Davidson, Honibar anepdang Sydney nung asü. Alan arishi küm 92 liasü. New South Wales all-rounder aser left-arm swing bowler, Alan-i cricket asaya arudang Australia atema Tests asaya 44 nung pai shilem agiogo. Test career nung Alan-i wicket 186 agi aser run 1328 yangluogo.

Iba dak alia, 2011 küm International Cricket Council's Hall of Fame nunga pa züngoka liasü.

"Australian cricket aser alima tesem ajunga nung cricket meimertem atema Alan Davidson asüba osang ya tejashitsüka ka asütsü," ta CA chairman Richard Freudenstein-i ashi.

"Iba asaya nung Alan ya asayar tongtibang ka liasü. Australia aser NSW tenüng nungi asayar tajung ka ama asayaba kisüng masü, saka administrator, tesayur aser benefactor ka ama iba wadang nung pai shilem tulu agia nungitogo.

"Asayatsü sempet tajung aliba den kecha dena masadangtetsüsa Alan-i bendanga agüja cricket

asayaogo. Pa (Alan) tsüngsü nung anidaker asayar shia atema cricket nung pai inyaktetta yütsübatem tatishitsü tulu asütsü," ta Richard-i ashi.

1953 küm Ashes series nung Davidson-i Australia atema Test nung mezüng asaya liasü aser 1960 küm test asaya ka nung wicket 10 agia aser run 100 yanglutetter asayar rongnung pa mezüng aküm.

Brisbane nung Test asaya tatemlen, West Indies den Australia draw asütsü atema, Alan Davidson temeyong raksar liaka pai meranga asaya aser team atema run 80 bendenloktsü.

Cricket asaya nungi anener sülen, 1979 küm nungi 1984 küm tashi Davison-i Australian test selector ama inyaka liasü.

Sydney Cricket Ground kübok Members Pavilion, kong Davison-i trustee ama küm 20 tashi inyaka liasü, pa nem akhüm agütsütsü atema iba Pavillion nung wako tom tashi atsütsüka liasü.

Anogo ka tejakdang, Adelaide nung taoba mapang Australia cricket team indang spin bowler Ashley Mallett cancer agi asüba sülen, anogo ka lir Davidson süogo.

### BILEMDANGANG

"Kati ka angatettepba  
ajanga tesunep adoker."